

Paonori Tisaronicaquë ya'huëpisopita ninshitërinso'

**Imapisopita yonquiaton,
nanan a'patërinso'**

1 ¹Ca Paonoco ninshitaranquëma', ni'co'. Noyanquëma' canpitanta'. Noya quiyanta' ya'huarai. Ya'ipi Yosë imaramasopita Tisaronicaquë ya'huëramaso' ninshitaranquëma'. Siripano, Timotio, inapitanta' isëquë ya'huapi. Inapitaro'coi nanan a'patarainquëma'. Canpitanta' Tata Yosë chinotatoma', Siniro Quisocriso imarama'. Inaora nohuanton, Yosë noya catahuainquëma'. Asanocancainquëma'. Quisocrisonta' inapochachin catahuainquëma', tënahüë.

**Cancanëna quëran
huarë' imapiso'**

²⁻³Nani tahuëri canpita marë' Yosë nontërai. Tata Yosë natëtoma', noya ninama'. Ninosoroatoma', na'con nica-tahuarama'. “Siniro Quisocriso co onporonta' naniantarinpoahuë'. Inasá-chin ninarëhua’,” ta'toma', chiníquën cancantërama'. Napoaton yonquiatëin-quëma', Tata Yosë nontërai: “Ma noya Tata catahuan ni'ton, cancanëna quëran huarë' imasarinënuën. Ina marë' ‘Yosparinquën, itërainquën,” itërai Yosë nontatoi. ⁴Tata Yosë na'con nosororinquëma', iyaro'sa'. Nani huayoninquëma' huëntonënuquë ya'conacaso marë'. Nani ina nitotërai. ⁵Quisocriso nanamën a'chintohuatëinquëmara, co topinan quëran a'chintërainquëmahuë'.

Ispirito Santo chachin catahuanincoi a'china'huaiso'. Canpitanta' catahuaninquëma' noya natanacamaso marë'. “No'tëquën nontërinpoa’,” ta'toma', ya'ipi cancanëna quëran natërama'. Ina nicatoi: “Tëhuëenchachin Yosëri huëntonënuquë aya'conin,” tënai. Canpitataquë ya'huapoi, noya imarai canpitanta' noya imacamaso marë'.

⁶Ina marë' aparisitopirinacoihuë', noya cancantërai. Canpitanta' Yosë nanamën noya natanama'. Imaramaso marë' aparisitopirinënuquëmahuë', Ispirito Santo catahuaninquëma' ni'ton, nóya cancantërama'. Quiya pochin cancantatoma', chiníquën cancantërama'. Nonanpatamacoi, Quisocriso chachin nonanarama'. ⁷Parisitapomarahüë', co a'poramahuë'. Nóya imarama' ni'ton, a'napita imapisopitanta' natantopi. “¡Ma noyacha inapitaso' imapi paya! Ina pochin Quisocriso imacaso' ya'huërin,” topi. Ya'ipi Masitonia parti, Acaya parti, inaquëpita napopi. ⁸Noya imarama' ni'ton, ya'ipi inaquë ya'huëpisopita nicatënuquëma', yonquipi. Naporahuaton, ya'ipi ina parti nahuinin. Co quiyari sha'huitopiraihuë', ya'ipiya nitotopi. ⁹Inapita chachin canpita naporamaso' sha'huiantapi: “Paono ni'quihuachincoira, noya a'chintërincoi. Noya natanatoi, a'naroáchin natërai. Mamanshi a'porahuatoi, Tata Yosëfchin chinotërai. Ina imarai huachi. Yosëso' nanpirárin. Inasáchin chinotacaso'

ya'huërin. ¹⁰Ina chinotatoi, hui'nin chachin ninarai. Canpoa marë' Quisocriso chiminin. Ina quëran Yosëri ananpitaantarin. A'na tahuëri inápa quëran o'mantahuachin, nicha'ësarinpoa'. Co imapisopitasohuë' nipirinhüë', Tata Yosëri no'huiton ana'intarin huachi, tënama',” topi, natantërai.

Paonori noya a'chintërinso'

2 ¹Canpitataquë ya'huapoi iyaro'sa', co topinan quëran a'chintërainquëmahuë', nitotërama'. ²Piriposëquë a'chinapiraihuë', no'huitonacoi, chiníquën aparisitërinacoi. Inapotopirinacoihuë', canpitataquë canconpatëira, co të'huaraihuë'. “Yosë catahuarincoi,” ta'toi, Quisocriso nanamën a'chintërainquëma'. A'napita no'huipirinacoihuë', chiníquën cancantatoi, pënërainquëma'. ³Co nonpin nanan a'chintërainquëmahuë'. Co nisha nisha nicacaso marë' a'chintërainquëmahuë'. Co pi'pian tëranta' nonpintërainquëmahuë'. ⁴Yosë chachin acorincoi nanamën a'china'huaiso marë'. “No'tëquën a'chinapona,” ta'ton, a'parincoi. Napoaton co piyapi'sa' noya nicainacoiso marë' a'chinaihuë'. Yosë noya nicainacoiso marë' a'chinárai. Ya'ipi yonquirëhuasopita nitotërin. Ma'marësona sacatërëhuasonta' nitotërin. ⁵Co noyasha nonatoi, yanonpintërainquëmahuë'. Co canaca'huaiso marë' napotërainquëmahuë'. Yosë ni'sárincoi, no'tëquën nontërainquëma'. ⁶Co piyapi'sa' noya nicainacoiso' yonquiatoi a'chinaihuë'. ⁷Quisocriso a'parincoi ni'ton, chiníquën nanan quëtërincoi. Napoaponahuë', co chiníquën nontërainquëmahuë'. Co inso tëranta' hua'an pochin camairaihuë' natëinacoiso marë'. Sanoanan quëran nontërainquëma'. Sanapi hua'huinpita nosoroaton, noya nocomarinso pochin

quiyarimanta' ni'nainquëma'. ⁸Na'con nosoroatëinquëma', Yosë nanamën a'chintërainquëma'. Ina marë' parisitopiraihuë', co ina yonquiraihuë'. Ya'ipi cancanëhuëi quëran nosororainquëma' ni'ton, na'con catahuarainquëma'. ⁹Canpitataquë ya'huasocoi, chiníquën sacatatoi, a'chintërainquëma'. Tahuërirë chachin tashirë chachin sacatërai ama topinan ma'sha ma'paca'huainquëmaso marëhuë'. Quiyaora sacatonëhuëi quëran coshatërai. Naporahuato, Yosë nanamën a'chintërainquëma'. Co ina naniantëramahuë', tënahüë.

¹⁰No'tëquën Yosë natëtoi, noyasáchin ninai. Co manta' onpotërainquëmahuë'. Ya'ipi imaramasopita ni'namacoi. Yosënta' ni'nincoi. ¹¹Ya'ipinquëma' pënërainquëma', nitotërama'. A'naya a'nayanquëma' nontërainquëma' noya imacamaso marë'. Quëmapi hui'ninpita a'chintërinso pochin a'chintërainquëma'. ¹²Achinicanainquëma'. “Yosë imarama' ni'ton, noyasáchin nico' Yosë noya ni'linquëma',” itërainquëma'. Ina acorinquëma' hua'anëntërinquë ya'conacamaso'. A'na tahuëri ya'huërin'pa' quëpantahuachinquëma', noya noya ya'huëcontarama'.

¹³Yosë nanamën a'chintohuatëinquëmara, noya natanama'. “Co piyapi yonquirinso' a'chintërinpoahuë'. Yosë nanamën chachin a'chintërinpoa',” tënama'. Tëhuëinchachin Yosë nanamën ni'ton, ina natëhuatama', nanamën quëran anoyacancantarinquëma'. Ina marë' nani tahuëri “Yosparinquën,” itërai Yosë. ¹⁴Iráca Cotia parti na'a piyapi'sa' Quisocriso imatona', natëpi. A'napita cotioro'sariso nipirinhüë', no'huitona' chiníquën aparisitopi. Iporaso' iyaro'sa' canpitanta' parisitërama'. Ya'huëhuano'sa' inapochachin aparisitarinëinquëma'.

¹⁵Íraca cotioro'sari pënéntona'piro'sa' no'huitona', tēpapi. Ina quēran Sinioro Quisocristo chachin o'mahuachina, inanta' tēpaantapi. Quiyanta' aparisitatonacoi, a'parinacoi. Napopiso marē' Yosēri co noyahuē' ni'nin. Tēhuēnchachin co ya'ipi piyapi'sa' nosoropihuē'. ¹⁶Nisha piyapi'sa' cha'ēcaiso marē' yaa'chintopiraihuē', cotioro'saso' co nohuantopihuē'. “Ama a'chintocoso-huē',” ta'tona', no'huirinacoi. Ina marē' aquē aquētē' oshahuanpi. Napoaton Yosēri chiníquēn no'huirin. No'téquēn ana'intarin huachi.

Paonori nicapon yapaantarinsó'

¹⁷Hua'quimiáchin iyaro'sa' co ni'pirainquēmahuē', co naniantērainquēmahuē'. Yonquiatēinquēma', na'con nohuantērai nica'huainquēmaso'. ¹⁸Canpitataquē yapa'piraihuē', ipora huanta' co nanitērai huē'. Ca Paonoco cararo' yapa'pirahuē', Satanasē ya'copirincó ni'ton, co nanitērahuē' paca'huaso'. ¹⁹Na'con yonquiatēinquēma', nóya cancantērai. ¿Ma'marē chachinta' ina pochin cancantērai? Imarama' ni'ton, Yosē ya'huērín'pa' canpitanta' pa'sarama', tēnai. A'na tahuēri Sinioro Quisocristo o'mantararin. Naporo': “Quiyari a'chintērai ni'ton, imapi,” ta'toi, noya cancantarai. ²⁰Tēhuēnchachin noya imarama': “¿Ma noyacha Yosē catahuarinquēma paya!” ta'toi, capa cancantērai.

3 ¹Hua'qui' co ni'nainquēmahuē'. Co nanan tēranta' natantērai huē'. Napoaton co huachi ahuantatoihuē', “Quiyaora Atinasēquē quēparichii,” ta'toi, ²Timotio a'patērainquēma' nitotacaso marē'. Inanta' noya imarin. Yosēri acorin Quisocristo nanamēn a'chinacaso marē'. Achinicanainquēmaso marē' a'patērainquēma'.

³Canpitanta' parisitapiramahuē', co nohuantērai huē' nisha nisha yonquicamaso'. Co ina marē' a'pocaso' ya'huērín huē'. Quisocristo imapatēhuara, aparisitērinēnpoa'. Yosē nohuanton, ina marē' parisitarēhua', nani nitotērama'. ⁴Canpitataquē ya'huasocoi, sha'huitērainquēma'. “Imarēhuaso marē' aparisitarinēnpoa',” itērainquēma'. Napotērainquēmaso pochachin iporaso' aparisitarinēnquēma'. ⁵Napoaton caso' co huachi ahuantatohuē', Timotio a'patērainquēma' onpopinso na imaramaso' nitota'huaso marē'. Sopai yanonpintērinpoa' Yosē a'pocaso marē'. Minsērainquēma' naporini, topinan quēran a'chinchitēnquēmahuē'. “Co huachi noya imamaraihuē',” ta'toi, Timotio a'patērainquēma'.

⁶Iporaso' nani huēnantaton, nanan sha'huitiirincó. “Ipora huanta' noya imasapi. Inahua capini noya ninoso-roapi,” itiirincó. Na'con yonquiramacoi. Quiya pochin cancantatoma', canpitanta' yani'namacoi. ⁷Inanta' sha'huitiirincó. Ina natantatoi, nóya cancantērai. Ipora huanta' ma'sha onpotērinacoi. Parisitapiraihuē', noya imarama' ni'ton, noya cancantarai. ⁸Quisocristo imamiatarama' ni'ton, co huachi sētērai huē'. Chiníquēn cancantarai. ⁹Capa cancantērai ni'ton, ¿onporahuatēicha noya noya: “Yosparinquēn Tata Yosē,” ichii? ¿Co'chi nanitērai huē' paya! ¹⁰Nani tahuēri tashirē chachin Yosē nontarai canpitataquē paca'huaiso marē'. Co ya'ipi Yosē nanamēn nitochátēramahuē'. Pahuantarinquēma' ni'ton, ina a'chinchinquēma' noya noya imacamaso marē', tēnahuē'. ¹¹Tata Yosē chachin catahuaincói onpopionta' pa'li. Sinioro Quisosonta' catahuahuachincói, pa'sarai nicapoinquēma'. ¹²Na'con nosororainquēma'.

Inapochachin canpita capininta' ninosorocamaso' ya'huërin. “Catahuaquë' Siniro noya noya ninosoro'ina'. Ya'ipi piyapi'sa' nosoro'ina',” itërahüë, Yosë nontato. ¹³Noya ninosorohuatama', Quisocriso achinicananarinquëma' noyasáchin nicacamaso marë'. Catahuahuachinquëma', noyápiachin cancantarama'. Ina quëran Quisocriso o'mantahuachin, Yosë noya ni'sarinquëma'. A'na tahuëri ya'ipi piyapinënpitarë' chachin o'mantararin.

Yosëri noya ni'ninsopita

4 ¹Iporaso' iyaro'sa' Siniro Quisoso nanan quëtërincoi ni'ton, pënëantarainquëma'. Iráca pënënainquëma' noya nicacamaso marë'. “Noya nipatama', Yosë noya ni'sarinquëma',” itërainquëma', natëramacoi. Iporaso' aquë aquëtë' natëtátoma', noyasáchin nico', ténahuë.

²Siniro Quisoso a'chintërincoiso chachin sha'huitërainquëma', natanama'.

³Yosë nohuantërin noyasáchin nicacaso'. Ama pi'pian tëranta' monshihuancosohüë'. ⁴Sanapi nohuantohuatama', ama monshitocosohüë'. Nitatoma', noya sa'aco'. Yosë yonquiatoma', noya ichiya'huëco'. Nani sa'apatama', inasáchin yonquicaso' ya'huërin. ⁵A'naquën co Yosë nohuitatonahuë', ichihuë'ëcaisoachin yonquiatona', a'naroáchin mapi. Ama inapita pochin cancantocosohüë'. Tëhuëchachin nosoroatoma', maco'.

⁶A'na quëmapi sa'in ama së'huacosohüë'. Ama ina pochin ni'toma', so'in nonpintocosohüë'. Së'huahuatama', Yosë no'tëquën ana'intarinquëma'. Iráca inachachin chiníquën pënënainquëma'. ⁷Co Yosë nohuantërinhuë' oshahuanacaso'. Acorinpoa' noyasáchin nicacaso marë'. ⁸Co quiyaora yonquënëhuëi quëran pënënainquëmahuë'.

Co natëhuatamahuë', Yosë chachin co natëaramahuë'. Ina nohuanton, Ispirito Santo ya'coancantërinpoa' noya nicacaso marë'. Inaso' noyasáchin ninin.

⁹Imaramasopita capini noya ninosoroco'. Nani nitotërama' ni'ton, co aquëtë' sha'huita'huanquëmaso' ya'huërinhuë'. Yosë chachin cancanëmaquë anitotërinquëma' ninosorocamaso'. ¹⁰Nani huachi imapisopita nosoroarama'. Ya'ipi Masitonia parti ya'huëpisopita aquë ya'huëpirinahuë', Quisocriso imapachinara, nosororama'. Iporaso', iyaro'sa', na'con na'con ninosoroco', ténai. ¹¹Nani tahuëri yonquico' sano piyapi nicacamaso marë'. Ama topinan ya'huëcosohüë'. Ya'ipinquëma' noya sacatoco' ama pahuanchinquëmasohüë'. Iráca inachachin pënënainquëma'. ¹²Inapohuatama', noya ya'huarama'. Co imapisopitahuënta' noya ni'sarinenquëma'. Napohuatama', co manta' pahuantarinquëmahuë'. Co topinan ma'patacaso' ya'huëaponhuë'.

Chiminpisopita nanopiantarinso'

¹³Chiminpisopita ma'sona onpocaiso' a'chinchinquëma', nitotoco'. Quisoso imarëhuasopita chiminpatëhua', nanopiantarihua'. Co imapisopitasohüë' nipirinhüë', quëmopinënpita chimin-pachinara, sëtopi. “Co onporonta' quënantarihua'huë',” ta'tona' sëtápi. Ama inapita pochin sëtacaso marëhuë' canpitaso' a'chinchinquëma'. ¹⁴Quisoso' chiminaponahuë', nanopiantarinso' nitotërhüa'. Inapochachin imapisopita chiminpachina', Yosëri ananpitaantarín. Quisoso isoro'paquë o'mantahuachin, ananpitaantarín.

¹⁵O'mantahuachin, co nanpirëhuasopitaráchin pantarihua'huë'. Chiminpisopita'ton nanopiantarapi. Siniro Quisoso sha'huitërinpoaso chachin

sha'huichinquëma'. ¹⁶Chiniquën nanantaton, o'mantararin. Anquëni hua'aonta' chiniquën sha'huirarin. Yosë nohuanton, tronpita pihuirarin. Naporo' Quisocristo imatona' chiminpisopita'ton nanopiantarapi. ¹⁷Ina quëran a'naroáchin nanopirëhuasopitarë'quënpoa' chitoro' ya'huërinquë quëpantarinpoa'. Inaquë Siniro nacapiarihua'. Inarë'quënpoa' ya'huëmiatarihua'. ¹⁸Inapita yonquiatoma', nisha'huitoco' noya cancantacaso marë'. Ama sëtacaso marëhuë' ina pochin niachinicancanco'.

5 ¹Onporosona o'mantacaso' tahuëri nancaso', co ina iyaro'sa' a'chintaranquëmahuë'. ²Iraca sha'huitërinpoaso' nani nitotërama'. Co nitotasoihuë', o'mantararin. Ni'co' iyaro'sa'. Yono tashi' co nitotasëhuahuë', ihuatona'pi pëinënpoaquë ya'conin. Inapochachin a'nanaya Quisocristo o'mantararin. ³Co imapisopitasohuë' o'mantacaso' tahuëri co yonquipihuë'. "Noya ya'huarëhua', co manta' onpoarihuahuë'," topirinahuë'. A'nanaya chiniquën ana'intacaso' naniarin, co cha'ësapihuë'. Sanapi yahuaihuachina, onporosona iquitacaso' co nitotërinhuë'. A'nanaya iquitërin. Inapochachin a'nanaya Yosëri ana'intarin. ⁴Canpitaso nipirinhüë', co tashi pochin cancantëramahuë'. O'mantacaso' tahuëri nanihuachin, co pa'yanaramahuë'. Ihuatona'pi a'nanaya huë'pachina, apa'yaninpo'. Inapochachin Quisocristosos' a'nanaya o'mahuachin, na'a piyapi'sa' pa'yanapona'. Canpitaso nipirinhüë' ina tahuëri ninaarama'. Nanihuachin, co pa'yanaramahuë'. ⁵Quisocristo imarama' ni'ton, tahuëri pochin cancantatoma', nitotarama'. Ya'lipinpoa' imarëhuasopita co tashi pochin cancantërehuahuë'. ⁶Napoaton o'mantacaso' tahuëri yonquiatëhua', noya ninahua'. A'naquënso' huë'ërëso

pochin cancantatona', co ina tahuëri yonquipihuë'. Canpoaso nipirinhüë' no'tëquën yonquiatëhua', sano cancantahua'. ⁷Yahuë'ëpachinara, tashi' huë'ëpi. Yano'pihuachinaranta', tashi' no'pipi. ⁸Canpoaso nipirinhüë' tahuëri pochin cancantacaso' ya'huërin. Napoaton noya yonquiatëhua', Yosë imamiatahua'. Ni'co' iyaro'sa'. Inimicoro'sa' huë'pachinara, sontaro'sa' co topinan pa'pihuë'. Coton hua'na quëran nininso' a'mopi. Casconta' hua'na quëran nininso' yancopi ama inimicori ohuanacaso marëhuë'. Noya nitapahuachinara, co inimicori minsërinhuë'. Hua'na a'mopiso pochin canpoanta' Yosë natëahua' catahuainpoa'. Ina natëtëhua', noya ninosoroa'ahua'. "Yosë a'pairinpoa'. O'mahuachin, noyá nicha'ësarinhüë'," ta'tëhua' noya ninahua'. ⁹Co ana'intinpoaso marë' Yosë acorinhüë'. Siniro Quisocristo imarëhua' ni'ton, nicha'ësarinhüë'. Ina nohuanton cha'ësarëhua'. ¹⁰Canpoa marë' inaso' chiminin. A'naquënpoa' nanopiarëhua', a'naquënpoa' chiminarihuarahuë', o'mantahuachin, ya'ipi imarëhuasopita quëpantarinpoa'. Inarë'quënpoa' ya'huëmiatarihua'. ¹¹Napoaton nani tahuëri nicatahuaco' chiniquën cancantacamaso marë'. O'mantacaso' tahuëri yonquiatoma', na'con ninontoco' noya noya imacamaso marë'. Nani noya nicatahuarama'. Aquëtë chachin niachinicancanco'.

Piquëran huarë' pënëninso'

¹²Ansiano'sa' iyaro'sa' noya ni'co', tënahüë. Siniro nohuanton, ansiano ya'conpi pënëninquëmaso marë'. Co chirotonahuë', a'chintarinëinquëma'. Pëshonpatama', otërarinëinquëma' ni'ton, noya ni'co'. ¹³Na'con catahuarinëinquëma' noya noya Yosë imacamaso marë'. Napoaton

nosoroatoma', noya yonquirapico'. Ya'ipin-
quëma' noya nini'toma', ya'huëco'.

¹⁴Canpita capini iyaro'sa' nipënëco'.
A'naquën co yasacatopihuë'. Inapita
pënëco' ama chiroinasohuë'. A'naquën
ma'sha onpohuachinara, Yosë yana-
niantopi. Inapitanta' noya nontoco'
chiníquën cancanchina'. A'naquëonta'
cancanëna quëran co chinipihuë'. Cata-
huaco' ama Yosë nanianchinasohuë'.
Inapohuatama', ama insonta' no'hui-
cosohuë'. Sanoanan quëran pënëco'.

¹⁵A'napita ma'sha onpotohuachinën-
quëma', ama ya'huëretocosohuë'. Nani
tahuëri noya nontoco'. No'huipirinën-
quëmaonta', nosoroatoma', catahuaco'.
Canpita capini ninosoroatoma', a'napita
piyapi'santa' catahuaco'.

¹⁶Ama sëtocosohuë'. Yosë yonquia-
toma', nani tahuëri noya cancantoco'.
¹⁷Apira apira Yosë nontoco'. Ama
a'na tahuëri tëranta' pahuancoso-
huë'. ¹⁸Ma'sha onpotopirinënquëma-
huë', ama sëtocosohuë'. Nani tahuëri
"Yosparinquën Siniro," itoco'. Ma'sha
onpoapomarahuënta', noya cancantoco'.
"Inanta' Siniro noya," itoco'. Quisocristo
imarëhua' ni'ton, ina pochin
cancantacaso' Yosë nohuantërin.

¹⁹Ispirito Santo ya'coancantërinquëma'.
Cancanëmaquë nontohuachinquëma',
a'naroáchin natëco'. Ni'co'. Pën noya
orotohuachina, noya napëntërë'. Inapo-
chachin Ispirito Santo yacatahuarinpoa'
noya cancantacaso marë'. Ama pën
atacopitërëso pochin nitocosohuë'.
²⁰"Yosë anitotërinco sha'huichin-
quëma," itohuachinënquëma', noya

natanco'. ²¹Napoaponahuë', ni'cona
nonpintochinënquëma'. A'naquën
"No'tëquën a'chintaranquëma',"
itohuachinënquëma', ama a'naroáchin
natëtocosohuë'. Ya'ipi napopiso' Yosë
quiricanën quëran tantiaco'. "Inaora
yonquinën quëran a'chinamara,"
ta'toma', tantiaco'. Yosë nanamën-
sáchin natëcaso' ya'huërin. ²²Ya'ipi
aoshahuaninquëmasopita a'poco'.

²³Yosëichin asanocancaninpoa'.
Canpita marë' ina nontarahuë noyásha
anoyacancanchinquëma'. "Catahuaquë'
Siniro, ya'ipi cancanëna quëran noyá-
piachin yonqui'ina'. Naporahuaton,
ya'ipi yonquinëna quëran noya ninin-
sopitaráchin nohuanchina'. Quëma
nohuanton, ya'ipi nonëna quëran
huarë noyasáchin niina'," itërahuë. Ina
quëran Siniro Quisocristo o'manta-
huachin, nóya ni'sarinquëma'. ²⁴Yosë
nani nontërinpoa' imacaso marë'.
Huëntonënquë chachin aya'coninpoa'.
No'tëquën sha'huitërinpoa'. Co onpo-
ronta' nonpintarinpoahuë' ni'ton, noya
catahuarinpoa'.

²⁵Quiya marënta' iyaro'sa' Yosë
nontoco'.

²⁶Imaramasopita capini noya nino-
soroatoma', nisë'quëco'.

²⁷Niyontonpatama', iso quirica
nontoco' imapisopita nataina'. Siniro
nanan quëtërinco ni'ton, nontoco' ya'i-
piya nataina', tënaahuë.

²⁸Inaora nohuanton, Siniro Quiso-
cristo nosoroatënquëma', catahuain-
quëma'. Nani ninshitëranquëma huachi.

Paono